

四庫全書

集部

欽定四庫全書

集部

石倉歷代詩選卷四百五十八

詳校官右中允<sub>臣</sub>薩敏

侍讀<sub>臣</sub>孫球覆勘

總校官進士<sub>臣</sub>朱鈐

校對官中書<sub>臣</sub>汪學金

謄錄監生<sub>臣</sub>錫福

欽定四庫全書

石倉歷代詩選卷四百五十八

明 曹學佺 編

明詩次集九十二

何景明

瑤瑟怨

美人竹間亭  
虛簾空月華  
相思湘江曲  
淚竹生斑花  
花開為誰好  
花落不復掃  
出戶見春風  
低頭怨芳草  
坐彈

五十絃起視江月殘愁絃不堪聽手澁金鴈寒一彈正  
淒切再彈轉嗚咽三彈撥幽腸聲亂冰絲結西風吹笑  
蓉一夜落舊紅豈知瑤瑟音能消青鏡容

雙燕篇

雙燕何翩翩飛去仍徘徊依依止畫閣繾綣鳴東廂昔  
求屈陽節今去易寒涼祗恐秋風高海路多煙霜雙飛  
入君戶雙栖在君梁被蒙君仁惠彈射不相防養雛毛  
羽成送雛還故鄉雛無黃雀報歲願巢君堂

武陵

武陵一何長遼遠不可測高林多悲風慘澹日無色黃  
熊啼我前白狐跳我側蛟螭蟠深淵下見奔雲黑沙蒸  
水亦毒我僕饑且踣辭家忽踰秋適此萬里國土風日  
以殊川域邈無極伏波有遺響吟餘轉悽惻何因托橫  
吹一寫千載憶

自武陵至沅陵道中雜詩

驅馬山上行山高何巍巍修阪接飛翼百步仍九迴俛

視煙靄中衆山鬱何壘茫然望四海萬物亦已衰昔我  
別京國朱華猶未希歲節忽復易何時當旋歸

其二

山勢行轉促連峯相貫輸窈然林莽中乃復得坦途青  
壁結煙靄縹緲凌虛無層阿秀嘉木下覆清水渠夙志  
好幽僻覽茲耳目娛公車雖少延顧盼忽已踰安得鼓  
清瑟日坐山之隅

花崖梧桐

相生何依依其葉何油油白雲陰崇阿朝日照高丘感  
此雨露滋愧彼蔓草儔鳳凰久不至琴瑟誰可求吾將  
絃繁絃庶以宣我憂

平越

清晨發平越霧暗山益密僕夫各相戒路遠恐迷失薄  
午游氣清參差衆峰出鷄鳴谿谷中始見崖上日雲葉  
分杳冥高原被華實秋風起叢林興感乃非一悠悠遠  
行遊歷險難具述

普定

鼓絕掩山城空堂思超忽孤燈明夕惟悄悄涼風發落  
葉何飄蕭飛螢互明沒客牕臨古寺坐待微鐘歇

涿鹿道中

高城鬱莽蒼永路多荊棘日氣夕以陰遊氛浩無極城  
邊古時丘宿草蔓于域樹木何蕭蕭狐狸鳴其側訪古  
思軒轅窵崙何由陟伊昔奮龍戰明明庶邦式神馭飄  
鼎湖烏號緬玄德遺踪邁荒野盛烈存茲國誰云戡亂



功不俟干戈力風雲變俄頃明晦古難測薄暮窮林中  
怒馬長太息

渡河

夙征肇延津明晨臨大河洪源下積石砥柱屹嵯峨渺  
渺梁宋區汗漫縱經過自非陵與岸於安障其波揚帆  
赴中流四顧莽無涯崇雲徂廣澤迅風夕吹沙積陰不  
可測魚龍偃相加前無千尺梁一葦胡足誇人生寡恒  
居奚異波上槎豈無舟楫志漂泊當柰何

許下

伊昔炎漢季西京方遘患宮室燒燔盡乘輿播草間  
劫遷留茲域荆棘滿頽垣橫流一以濫大厦寧復完豺虎  
互馳噬鵑鴉厲飛翻日月屢薄食風雲變無端嗟哉衆  
君子杖策起周旋荀公誠偉士弘思濟其艱陳琳自南  
至王粲亦西還從戎藉雄辯騰步有榮觀良蹇豈同御  
鳳鶩不共餐功名安足為明義乃高賢

還至別業

鷄鳴高樹杪，狗吠墟里間。家人望車徒，遠客造門端。  
入門問所親，上堂叙悲歡。行人暮饑渴，秉燭具盤餐。  
明月照西戶，三星爛中天。出門踐野草，白露條已漙。  
十年苦行役，茲夕方來旋。寧知非夢寐，忽忽心未安。

其二

詰晨親友至，筐楫攜所需。各言平生歡，念子久離居。  
綢繆語未畢，展席臨前除。園榮亦已抽，況有盤中魚。  
人情倦懷土，富貴豈常於。無為泥形迹，所願恒相俱。

七夕

逝節忽不處佳夕復我臨神飈汎光蕙渥露沾華林緬  
彼牛女會茲端竟難謀形影憺相望胡由接徽音飄飄  
翠龍駕髣髴青瑤簪長河坐移轉素波歛西沈靈彩歛  
以晦游雲起層陰同懽戀膠漆異處悲辰參翹思慕遠  
匹感此涕流衿

十三夜對月

閒居愛明月良節復與俱金魄麗秋闌皓彩揚雲衢澄

空歛霜煙清颺蕩中區徘徊廣庭內改席臨方除顧景  
怵衷慮興心念居諸天道遞消長戒之在須臾懷謙可  
久安盛滿豈恒居孰云質靡盈所貴光不渝

十四夜同清溪子對月

林塘枉佳客待月欣舉觴今夕勝昨夕已見生東方離  
離絳霄側冉冉素雲揚踰時灝氣澈縣耀天中央仰視  
渺難即忽覓在我傍清池含微波左右浥流光月行固  
當望人會何能常與子各鄉域邂逅臨此堂良時不屢

值明月安可忘醉歌答永夕和我窈窕章

十五夜高鐵溪同沈清溪趙雪舟馬百愚過救

居對月

端居撫盛節眷茲金素中上客弭飛蓋惠然慰幽衷  
圓景舒東隅忽復周層空重輪爛五色繽紛結文虹  
流輝接瑤席絳氣鬱以蔥衆賓侈佳翫聯篇挹華風  
情好在明月安問膳靡豐弦望有恒度明陰變無窮  
人生非比翼豈得常相同所願御此觴聊以娛夜終

十六夜月

日夕城煙歛列宿出復多開軒望明月展席流素波圓  
輝雖少虧猶能遍天涯單居不為樂念遠徒咨嗟遊人  
越崇京高樓結綺霞浮雲暮長征何由覩光華迅飈萬  
里至霜霧日以加坐憂桂枝歇委落同泥沙清輝苟相  
照豈慮天路何

贈望之

遙遙京洛客承命發華輶朝辭翼州野夕泛黃河流雙

旗翔汝側駟馬登故丘故丘鬱以長岡隴茂松楸車徒  
耀城郭親戚迎道周丈夫事四方州閭寧久留王程在  
須臾顧念但懷愁前有盈觴酒為我且綢繆

其二

清晨送遠人弭駕北城隈北城一何脩前臨古時臺俛  
仰故鄉域一如平生懷季冬嚴風發積雪皓皚皚念子  
徂遠路鬱結不能開中林寒卉寂樹木何摧頽安得春  
華敷採掇以相貽



其三

驅車策良馬北上遵太行升高睇崇京宮觀鬱相望前  
瞻碣石湍俯見東海疆壯觀局宇內高志何激昂孤鴻  
暮南翥奮翅起隨陽黃鵠遊四海胡為悲故鄉何能有  
羽翼從子俱翱翔

除夜

閒居知時節習靜觀卷舒日月無恒處念往寡歡娛歲  
徂浮雲陰積雪皓中衢豫章產江濱孤蕙敷山隅芳烈

雖靡虧遐遠寧見需所願勗明德庶以酌居諸

豔曲

御溝連上苑大道接平沙紫陌三千騎青樓十萬家城中楊柳樹風起暮飛花

其二

日出洛城裏歌鐘起四鄰朝遊桃李蹊暮踏車馬塵遊絲罥白日冉冉愁陽春

其三

明姿稱二八生長紫羅帷對客舞垂手邀人看畫睂今  
朝仲春日照影臨芳池

其四

翩翩五陵兒藉綺冠華簪常懷雙寶劍詎惜千黃金馳  
馬章臺下紅塵不可尋

擬古

朝日照中庭杲杲春載陽東風吹綠草蝴蝶雙飛揚歲  
華坐婉婉白露憖以傷予美不在茲所懷浩難忘豈無

芳桂枝含香誰為明

其二

淒淒仲秋日百卉腓以殘涼風入階樹零露摧庭蘭  
明月皎東壁昆蟲鳴草間孤鴻暮安適哀音揚雲端  
言眷平生友振翮起孤騫遺我若逝波望子如高山  
托忱在終始蓄久諒逾宣寸心不可移磐石誰謂堅

其三

圓如天上月光輝尚當缺與君非一身安能不乖別關

山日悠遠舉步難可越君如雙車輪妾心如車轍相隨  
萬里去繞繞何時絕

其四

清晨秣駕馬整駕遵路衢遲徊覽故物憫惻心以紆昔  
時千室邑今為百年墟郭郭穀粉櫝狐兔翔城隅人生  
寓大塊飄泊寡恒居諒無金石壽終與草木俱一身不  
自恤安用顧其餘營營慕富貴辛苦誠為愚

其五

歲暮寒風至蟋蟀夜鳴悲高樓有思婦嘆息不自怡良  
人行未遑孤妾守空閨衾裯卷不寢羅帷誰為施君如  
東流水妾如西馳暉形勢不相及彼此何由諧結髮重  
自念攜手期同歸秋華殞故林尚復揚光輝顧茲各努  
力毋忘榮盛時

其六

繁霜降秋夜膏火寒無光淒風舉帷幄素月流中房客  
行在殊境獨處誰與將仰視天上星羅列皆成行牛女

獨何辜  
箠箠守河梁  
嗟無凌風翼  
欲去不得翔  
引領長太息  
泗涕徒沾裳

遊西山

晨登山上樓  
暮望河上道  
飄風塞埃塵  
積雨浩行潦  
山人苦相留  
此道何擾擾  
虎狼夾路鳴  
鴻鵠逝不早  
石泉聊足飲  
糲飯亦可飽  
矧乃平生親  
綢繆叙中抱  
行遊白雲林  
倘遇瑤華草  
攜手托相贈  
歲寒永為好

其二

勝地不可多良遊豈在屢茲山秀靈域曠望契心許  
崑碧巖際縹緲青蓮宇鳴泉瀉丹壁白沙亘迴渚眺心  
佇冥寂況有塵外侶吾當與爾曹翩翩接高舉

水營墅治田圃種樹

樵隱安於山農隱樂耕畔由來事不同各以性所玩倚  
扉憇南岡負杖行春岸時澤冒原隰遠水增波瀾方塘  
菰蒲映迴渚鳬鶩亂插柳期息陰列竹巢成竿緣坡引  
行條依墉植頽幹築堤屏勢穢激流代攜灌疎慵外經



濟卑賤鮮憂患諒懷原生恥庶悟孔父嘆汲古綴遺言  
欣焉秉柔翰

贈別孟望之

束髮事交結白首以為期以茲女蘿質託彼青松枝重  
聚故鄉園殷勤慰我私忽復遠行邁况值秋風時我有  
一罇酒送君潯水涯酒酣思無極臨岐理桐絲誰知清  
商苦一彈一生悲

元日言志

北杓建寅月東谷發首旦氣轉青陽暖日暎丹霞爛羣  
物欣向榮萬象脩改觀自予脫朝簪及茲謝塵幹世事  
鑑倚伏節候感迴換岩耕慕長沮淵綸恣永玩俯羨潛  
波鱗仰慙薄霄翰欽此無悶言忘彼高飛嘆勉懷日新  
志庶以慰朝肝

仲春雨霽出遊郊麓覽物叙懷興言自歌四首  
旬陰豁初霽臨眺城西洲泱泱松上溜潺潺石間流積  
霖晦平陸春雲彌崇丘眷彼農人談寫我終歲憂

崔巍南山郭宛彼沙上道荷篠赴脩垆采萍涉流潦懷  
賢顧已後適已每不早緬茲山中人含念鬱中抱  
幽人久見招解薛侯中林山行岩光暝水息霞氣陰隨  
行委流止寓物觀浮沈達人貴忘我奚用存知音

舉目怡清和周覽究昏晝衆壑積庭階攢峰羅戶牖攀  
林摘叢穎越巘采孤秀日暮天際雲忽與飄風邁

贈李獻吉

西方有佳士於世寡所諧橫風整修翰倏忽超九達天

門限重關屢扣關者辭濟濟列仙子冠裳競追隨青雲  
蔽閭闔仰視何逶迤皎日匿西陸馳光難遽回世無魯  
陽子坐惜朱顏衰

其二

東風吹我衣白日何杲杲整駕出郭門修塗浩橫潦登  
山采幽蘭日暮不盈抱采之欲何為遺我平生好豈無  
艷陽花言子好香草丈夫有本性安得不自保寸心苟  
弗移可以鑑穹昊

中秋十七夜留康德涵

飄風會浮雲白曜奄西藏羈人惜短晷眷此秋夜長  
長夜無與晤所懷浩難忘君子枉光駕嫵婉情未央披軒  
待流月展轉錯華觴臨觴慘不御對景久徬徨鬱霧曖  
庭陰黯黯如降霜流波委頽魄茲歲漸以更消長互相  
謝盛滿安可常勗哉君子心謙謙道彌光

贈田子

蓬途眷行旅綢繆永茲夕之子遡大江方舟自此適藹

卷四百五十八  
鵲皇邑遊鳴鑣並京陌同袍四五人君為遠行客婉孌  
一室內安知形影隔人生重貞固豈必金與石念彼膠  
漆友喟然感今昔

其二

蒼蒼季冬夕濺雲委中衢三星出東戶纖月揚西隅主  
人樂行觴衆賓且停車何況平生友夙昔共歡娛慘惻  
高堂上為子重踟躕山川緬以邈岐路在須臾出門慎  
自愛慰我恒相於

七夕劉子緯宅次君卿韻

良時屆今夕歡觀諧茲方流飈委芳卉清池激微涼仰  
觀牛女星熒熒河漢傍纖月揚西隅浮雲起中央合離  
一以愴明晦古難量繫子場下駒慰我長思望

贈君采效何遜作

霜空鴈絕響風庭葉罷飛念爾別離日淒然芳歲微城  
隅明星晷曉闌殘月輝不見攜手好宵行誰與歸

遊洪法寺塔園土山

塔園鬱森萃土山莽迴互迹陳慨往躅心賞詣秋晤時  
惟冬氣交零木爽登顧裊裊拾層級盤盤折修步憑危  
眺倒景俯檻驚流霧空王湧廟衛貴者留墟墓三門上  
岌業玉柱撐雲露白日寶光垂風晝金響度徒興雍門  
哀未暇首丘慮珠藏北邙毀石鐸南山銅怛焉傷逝心  
川汜激東鷺

冬夜

膏火含朱光玉鐫泛清醴閒房密以靜雪流窗戶裏良



友不我適室阻悵伊邇異人非我儔聊酌娛妻子

簡君采

夕會星已羅晝接景將落見面不須臾何以展契濶側  
耳金玉章音響時間作假寐晤清顏傾光豈虛託枉驂  
悵雲轡命席恥塵爵徘徊翳雲日佇立眺城郭駢居淹  
晨暮庶俾私心豁

集吳子寺館

首夏憇祇園遊息解冠簪窗楹抗䟽敞殿宇闕深沈綠

竹帶陰渠丹葩綴陽林既枉高人躅亦協靜者心琴書  
散煩慮鐘磬發幽音清言忘朝晷玄思超古今

夏夜薛子宅

飄風激踈牖飛雨散高庭白雲蔭華月青天垂列星  
褰裳望西苑園樹發青熒陰館辟炎埃峻檻臨巖亭泠  
泠朱夏井肅肅玄夜扃披霧聆霏談逍遙暢神形遊心  
娛竹素此樂誠可經

姜子嶺至三岔

出嶺上雲霓入谿下煙嵐高高不可極杳杳詎能探朱  
崖秀夏木石壁映寒潭千林覽葱蒨百丈窺澄涵崩奔  
谷響赴隱曜川光含登陟力不辭險阻情已諳潛淵羨  
垂綸越巘思停驂振策岷峨西揚帆江漢南臨深匪忘  
懼履坦但懷慙

乞巧行

鵲橋崔巍河宛轉織女牽牛夜相見岳陽女兒迎七夕  
乞巧樓高高百尺華燈明月光窈窕結綵蟠花綺羅繞

富家女兒恃嬌痴年年乞巧不得巧貧家女巧世所稀  
只為他人縫嫁衣須臾露濕金剪刀雙星漸沒河漸高  
人間天上兩迢遙步襪仙裙空寂寥君不見古來巧拙  
何足語歲歲樓前競兒女

古松行

岳州地多古松樹千株萬株值官路故老猶能記歲年  
行人不解知朝暮臨江西來煙霧起夾谷連山一百里  
黛色寒通七澤雲秋聲夜捲三江水郡城之北江水東

鄂王祠廟丹青空英雄為謨本宏遠古木至今多烈風  
忠魂義魄杳何在故物依然見遺愛繁枝百世人不剪  
直氣千尋我當拜六年前過蒲圻城古松陰中三日行  
空山倒掛雷雨黑盛夏常貯炎風清郵亭傳舍總蕭瑟  
鬱抱煩襟亦飄逸迴巖峭壁奔洪濤老蔓長藤翻白日  
只今復向巴丘道野草漸多松漸少仄徑孤根半蝕苔  
夕陽幾樹空垂蔦昔時所見合抱材斷枝落葉隨蒿萊  
過客山中想清籟行徒道上愁黃埃輦山輿嶺萬石重

半作豪家樓上棟古人之力今人勞大厦明堂不得用  
年年官吏催斧斤故老雖怒那敢嗔傍枝出地子成樹  
野婦山樵推作薪驛前數榦聊可數我忽見之再三撫  
霜皮露甲如虬蟠霧鬚煙鬟學龍舞陰森氣象凜猶昔  
翠魚長標不可侮荒林曠野識者稀終為誰家起廊廡  
回首鄂廟秋山阿廟前之樹無高柯鬼神訶護亦徒爾  
英靈不返將如何

盤江行

四山壁立色如赭盤江橫流絕壁下驚濤赴壑奔萬牛  
峻坂懸空容一馬危叢古樹何陰森尋常行客誰敢臨  
徭婦清晨出深洞虎辟白晝行空林沈潭之西多巨石  
短棹輕舟安可適日光射壁蠻煙黃雨氣蒸江瘴波赤  
土人行泣向我云此地前年曾敗軍守臣祇知需貨利  
將士欲苟圖功勲英雄謨策自有術竄婦奸男何足論  
營中鼓角連雲起陣前臨山後臨水烹龍醺酒日酣樂  
傳箭遺弓尚驚喜戰馬俱為山下塵征夫盡向江中死

遂令狐承成其雄屠邊下砦轉相攻千家萬家鷄犬盡  
十城五城煙火空夕陽愁向盤江道黃蒿離離白骨槁  
魂入秋空結怨雲血染春原長冤草只今四夷來歸王  
高墩短塹俱已荒牧童驅羊上塋塚田父牽牛耕戰場  
惟有行人行嘆息聞說盤江淚沾臆

黃陵廟

黃陵峽中灘水多黃陵廟下難經過峩峨巨舸牽百丈  
櫓折檣摧不得上江風蕭颭笳鼓哀廟門遙向楓林開



往來落帆泊江口  
俎牲咒神醺神酒  
南船下峽疾如箭  
岸草汀花看不見  
巉巖亂石撐如麻  
雲間濁浪迷三巴  
千里舟中坐超忽  
回首天西斷心骨

聽琴篇

美人橫琴坐我堂  
酒闌為鼓三四行  
燈孤月明客不發  
絃悲調急秋夜長  
吾家瑤琴久不拭  
金徽玉軫無顏色  
感君對此如有情  
一彈使我三嘆息  
樵歌響答山澗幽  
楚歌慷慨雲夜愁  
瀟湘倚蘭稍平逸  
四座但覺清商流

始聞白雪停翠竹烈飈吹我溪上屋忽然翻作廣寒遊  
知是霓裳羽衣曲含宮移羽何春容泠泠萬壑吟風松  
煙岑一夕怨鳴鶴江天何處驚蟠龍我初好音惟好此  
橫笛短簫徒聒耳平生頗抱鍾期懷四海難逢伯牙子  
今夕何夕願不違為君擊節淚沾衣高歌雅和人世稀  
河轉參橫君莫歸

孤鴈篇

孤鴈北來來幾時窮冬無侶鳴聲悲雲長路渺去安極

日暮天寒飛更遲  
洞庭瀟湘落秋水  
苦竹黃蘆一千里  
清怨時從鳴笛生  
斷行更逐哀箏起  
塵沙闌塞愁轉遂  
隨風且落江湖中  
微軀幸免庖人俎  
短翮長辭獵士弓  
君不見隴山鸚鵡  
解人語  
一生自恨黃金籠

雪中宴袁揮使惟武宅

四郊飛雪暗高城  
北風怒號天杳冥  
將軍宅中晝擊鼓  
哀箏鳴笛羅後庭  
我時凍吟在西野  
忽見將軍送書者  
開書讀罷喜即行  
邀我入門方下馬  
凝輝絢素開簾櫳

流風迴霰滿堂中青氍帳高雪不濕蘭燈夜照艷鮀紅  
卿家父子皆好客能留對雪歡今夕已看稱壽奉千金  
况復徵歌出雙璧梁園賓客多交遊謝家兄弟盡風流  
古人勝事長已矣吾輩優游亦爾儔

漢將篇

漢家西北煙塵起烽火夜照西京裏塞馬奔騰一萬騎  
關塞逶迤五千里飛符挿羽募精強連營列陣掃邊疆  
已見將軍屯細柳更聞天子獵長楊長楊羽獵兵威振

疊鼓鳴鉦聞遠近龍虎遙分天上軍  
魚蛇徧閱雲中陣  
長安驄馬俠少年金鞍玉轡鐵連錢  
共看拔劍追驕子  
自許彎弓射左賢  
驚風晝起邊沙漲  
踈勒黃雲迷所向  
飲馬寒臨月窟傍  
驅兵夜度天山上  
降旗歎節樹戎城  
卷旆迴旌入帝京  
征人半死龍庭戰  
壯士俱標麟閣名  
麟閣功名不易得  
貴臣良相徒顏色  
威胡盡道李飛將  
還漢誰言蘇屬國  
玉門關外朔雲愁  
燕領書生亦白頭  
君王自憶廉頗輩  
義士羞稱萬戶侯

古峯畫梅歌

空江月墮孤山曉直幹橫枝疎更好夜來夢破碧窗虛  
殘雪半庭寒不掃小橋水淺影初斜野徑風清香未老  
霜魂月魄獨俦停玉骨冰肌自枯槁溪頭數點瘦花明  
塢雲漠漠林煙渺逋翁湖山詩思閒寂寂柴門春醉倒  
山亭晝午鶴飛還一聲長笛江門悄

古井篇

君不見城邊古井荆棘荒沙崩雨塌官道傍當時碧甃

映朱閣黃金闌干銀作床美人銅瓶響哀玉寧知委棄  
同悲涼梧桐花乾蘼花澁鷺鷥側窺蚯蚓八百丈寒泉  
尚堪飲心長綆短空愁立

隴右行送徐少參

隴右地長安西行一千里秦日長城號塞垣漢時故郡  
稱天水聖朝掃盪無烽烟射獵之地為桑田熟羌賣  
馬常入塞將軍遊騎不出邊知君風采古遺愛揚策傳  
符度關內父老三秦望節來犬戎諸夷遮馬拜開藩分

道鎮邊塵居守巡行歷幾春熊軾朱幘今岳伯豸冠白  
筆舊臺臣瓦亭之西半山谷土室陰陰連板屋落月孤  
城清渭源寒雲古磧黃河曲十年此地曾遊過別來風  
物今如何竹花秋臨鳥鼠穴楊葉夕渡魚龍波回看萬  
里風雲色少小趨庭淚沾臆相送悲吟不盡情關山隴  
坂高無極

大梁吟送李進士

大梁擅豪華鉅野生龍蛇頃來曹李輩擢秀冠詩家神



駒並逐兩超絕凡馬百萬空咨嗟李邕門下多奇士曹  
是賢甥李高第登龍自昔忝通家附驥相看總名世梁  
王臺館罷歌鐘兔園賓客有遺踪侯嬴舊隱夷門里李  
渤今歸少室峯回望高高瞻岳首即尋玄圃問河宗可  
憐二子詩家秀吾生已愧盧王後司馬黃金賦未逢揚  
雄白首書空就李當春日別燕川曹也誦詩神黯然蓬  
池更憶阮公嘯腸斷洪波綠水篇

憶昔行

憶昔長安相會日君方壯年我年小只今容顏有更變  
何況世事無紛擾先帝衣冠半零落十年賓友全稀  
少君今始作紫薇臣笑我金門落魄人馮唐上書亦嘆  
老子雲識字空愁貧艷陽三月桃李耀君非壯年我非  
少花開酒熟君遠行可惜春風阻懽笑明星迢迢車關  
闕遙向楚水辭燕山但看朱紱在腰下莫使白髮生顛  
間武昌城邊江色澱襄陽漢水尤堪羨東行何日訪鱸  
魚南飛不得隨鴻鴈少癖山水耽雲松兩年楚上多行

蹤浮湘直下三千里望岳遙瞻七十峰知君跌宕輕馬  
馬顧予豈是功名者安得浮沈帝座傍會須覽眺蒼梧  
野蒼梧風煙秋色開武昌高樓吹笛哀帝乘白雲去不  
返仙人黃鶴何時來君行訪古無化俗長楫輜軒指南  
極岸上遊穿羆虎林潭中坐傍黿鼉國他時倘覓桃花  
源北風為爾傳消息

樂陵令行

山東郡縣一百八無有一城無戰場到今漂血成野水

如山白骨橫秋霜雲臺功高將不收投筆亦有書生謀  
黃金大印賜豪貴白面豈得言封侯唐朝公卿集如雲  
平原太守名不聞二十四城見賊走抗城乃是平原守  
君不見前者寇盜時縣吏州官各亡命北梁白馬終日  
行濟上黃旗錯相映不聞開門戰但聞開門迎嗟乎平  
原太守樂陵令

九川行

君不見自從天地開天下之水皆西來黃河崑崙一線

出下轉秦甸轟奔雷長江廣漢兩盪滴濁涇清渭中紫  
迴帝遣九龍下治此江漢安流涇渭理華嶽中斷仙掌  
高却放黃河行萬里九龍蜿蜒上天去至今猶餘九川  
水秦中雲雨四時遍北地塵沙幾回徙我來長安不見  
九川水得見九川子九川子是常人朝辭川上麋鹿  
羣夕登青瑣為帝臣已從華袞補日月況執彤管排風  
雲長風西來吹北極西望川流渺何極野岸空懸舟楫  
心塞林暮繞波濤色吁嗟江漢猶阻兵中原不見黃河

清虺蛇豺虎滿道路黃埃濁浪無人行九川子何不更  
鞭九龍起坐視天下橫流水

送葉生還閩中兼懷鄭繼之

葉生行吟燕市中葛巾麻鞋歲將晚兩都為客今始歸  
五岳尋仙不辭遠江南畫舸春柳低海上茅堂白雲滿  
谷口如逢鄭子真為道棲遲未應返

同崔子送劉以正還關中

燕川芳草歇已久行子西行更回首駿馬春停渭曲花

金鞭暮指秦中柳看君兄弟皆豪雄十年側想中丞公  
東山雲月卧未起北海賓客誰相通荷花初紅酒初碧  
汝歸登堂見顏色若問長安舊友生崔何二子常相憶  
晚過田水南有贈

田郎閉門著書今幾卷我欲與子數相見譚浪雖稱青  
瑣賢經過罕識黃門面長安雨積鞍馬稀堂下苔生集  
秋燕四海何人問草玄一經徒使桓譚羨

延津歌送韓令

延津寇過餘少男延津縣令莫停驂雙鳧直向黃河北  
一鴈先飛清衛南黃河岸邊不種麥濁浪滔天多買客  
城中少男爾勿愁縣令到時為買牛

裕州行

今年春夏雨不絕黃河以南漸殺麥裕州城中十萬家  
自經寇盜惟黃沙名商大賈歲不集新絲舊穀嗟何及  
郝侯五馬天上來褰帷露冕開風霾教農服田賈服賈  
只有牛馬無豺虎



周儀賓朝天歌

周君來從大梁發，搖鞭却指秦樓月。  
燕山臘盡春未生，可憐裘馬衝霜雪。  
憶昨雲霄謁帝關，春卿引見紫宸班。  
天門九重羅虎豹，一月不得朝龍顏。  
館甥帝室恩數少，尚女王家禮非小。  
中山更傳聞樂對，陳王亦進通親表。  
伊昔梁王金盛時，車騎從官皆漢儀。  
遣使常聞八珍送，入朝數賜飛龍騎。  
百餘年間事勢殊，諸侯出或乘驢車。  
朱門賓從想冠劍，白頭王孫行路衢。  
君歸為我一問訊，

梁園賦客今何如

相逢行贈孫從一

長安風吹萬楊柳與君走馬相逢久  
昨朝邂逅尊酒間  
二十年來一回首我官十年前  
君官十年後眼底相看  
已壯齡世間萬事真翻手  
憶初少小來東曹君家兄弟  
同遊遨尚書庭前兩玉樹  
白日燦爛秋風高爾時見君  
氣已豪花顏雲鬢青錦袍  
石麟在天動鱗甲赤鳳排雲  
生羽毛只今骨格殊恒調  
傾都見者嗟英妙恨不置之

玉堂賓誰令久待金門詔永嘉山水稱絕奇且與謝客  
同襟期花裏開簾仙吏出松間著屐山人隨尚書風義  
古無比如君更是尚書子尚書東山閒白雲高卧不為  
蒼生起漢庭我亦東方生悵望名山無限情海雲浩歌  
起春色送爾萬里東南行

彭中丞四民圖歌

漁舟溟入桃花潯春山如聞樵採音高原犁鉏破煙雨  
書閣窈窕穿松林中丞雅愛山水障清晨自掛高堂上

綠樹逶迤轉衆流白雲合沓開層嶂萬里寧論戰伐功  
百年宛見升平象憶昨寇盜日橫行中原白骨哀蒼生  
攜男抱女路斷絕痛哭不見天邊城漁奔樵竄學士徙  
縱有隴畝無人耕至尊九重憂旰食命公殺賊賊始平  
近郊無復戎馬迹比屋仍傳鷄犬聲彭公壯年心許國  
何況此身際日月二載驅馳掃漢南一時談笑清河北  
出閫三分大將旗來朝獨擁諸軍節樂土重開白日光  
普天不動黃塵色即今西戎忽復驕朝廷親遣霍嫖姚

已聞土魯還金印不見中丞下赤霄形像雲臺猶未畫  
姓名麟閣早須標開圖更賦出車什四海甲兵從此銷

桃源圖歌

昔我遊武陵坐石窺花源岸圻丹洞闕風迴綠蘿翻崩  
崖奔古月沓嶂響哀猿行車一以過始知人境諠真陽  
仙令欲南往手持新畫來相訪武陵山水久不覩今晨  
置我高堂上巖穴如聞鷄犬聲村墟但見桑麻長髣髴  
潭水濱點綴桃花春山川似晉代衣服猶秦人回首茫

然一煙霧尋源誰復知真處投簪福地終有期箇中先  
認桃花樹

塞外獵圖歌

邊沙蕭蕭天北風高林晝屯鞍馬雄健兒裝束身手健  
真與此圖形貌同冬寒獵傍長城窟城下平原日將沒  
呼鷹放犬無不為數騎彎弓競馳突月高琵琶海西城  
拂廬雪乾氍毹輕金鍾酌酒亦易醉玉蹀躞驕不行  
白髮老兵黃戰裙抽箭仰視天山雲衆中若認射鵰手

漢家誰是李將軍

畫鶴篇

昔聞少保寫青田古墨千年人不傳  
郎君此幅何時得  
蕭颺秋堂掃煙色  
雪翎風翼如有神  
萬里出海誰能馴  
我初見此鳥重是仙人禽  
朝飲玉河濬暮宿玄圃林  
回首寒江鳧與鴈  
日晚哀鳴羨霄漢

赤壁圖歌

老瞞橫槊江之臯  
眼中吳越一秋毫  
吳人殼弩來江左

江頭鳴笳畫舉火旌旗飄揚北風前舳艫化作江中煙  
英雄一去音塵滅斷水殘山弔詞客白雪堂寒草煙暮  
黃泥坂下臨臯路酒酣喚客吹玉簫江風山月不待招  
昔時霸業那足數鶴夢悠悠眇千古回首東坡百世人  
圖畫蒼茫空有神

畫山水

蜀溪搗紙明如練并州剪刀碧雲斷抽毫作繪誰所為  
華堂粉壁光凌亂枳花竹葉春江曲江頭無人水空綠



逶迤石逕林中出草碧沙明淨江日欲覓秦人武陵下  
不見溪邊種桃者高樓窈窕鎖煙霧只疑行盡瀟湘路  
瀟湘却憶舊時遊紙上煙波生暮愁

吳偉飛泉畫圖歌

長安獨過田子舍留我一玩飛泉畫絕壁如聞風雨來  
晴天安得蛟龍掛吳生跌宕得畫理潦草落筆皆可喜  
飛泉却出沓嶂間山即真山水真水客堂六月生畫寒  
耳中髣髴高江灘源潭窈窕不可測波浪洶湧多奇觀

泉邊二老顏色異偶坐似是莊與惠萬里誰論到海心  
百年詎識臨淵意偉哉田子今儒宗文標南指匡廬峰  
不須對此更惆悵會觀瀑布青天上杉風松日隔縹緲  
雲瀧雪瀨何雄壯我常夢往神空向豈無吳生好手筆  
為我寫寄廬山障

遊獵篇

周王八駿行萬里朝遊崑崙暮滄海驅霆策電徧天地  
虎駮龍馳倏煙靄犇戎造父兩為佐大人王母遙相待

千金白狐來四荒  
螻蟻下國輕天王  
君不見秦皇叱咤  
役九有海東驅石  
石為走橋邊孺子  
如婦人博浪沙中  
鐵椎吼又不見武  
皇旌旗日絡繹射  
蛟潯陽江水赤五  
陵俠少夜相遇探  
丸殺吏還驚辟天  
門差戕城九重虎  
豹為衛蛟龍宮紫  
微鉤陳翼帝座至  
尊祇合安高崇脫  
淵之魚出山虎白  
龍魚服何勞苦沈  
江距河勢有然萬  
乘反遭匹夫侮君  
不見曹家老奘誠  
愚蒙平生不識司  
馬公死生禍福在  
人手寧能常作富  
家翁一門流血豈

足惜坐使神器歸奸雄昨夜昌平人夢天龍文赤日繞  
燕川城中莫辨真天子道上傳看七寶鞭腐儒為郎不  
扈從願奏相如諫獵篇

柳絮歌

長安三月百花殘滿城飛絮何漫漫千門萬戶東風起  
陌上河邊春色闌美人高樓鎖深院白花濛濛落如霰  
晴窗窈窕朝日遲亂入簾櫳趁雙燕遊絲相牽時裊裊  
委地飄廊不須掃君不見江頭綠葉吹香綿隨波化作

浮萍草

明月篇

長安月離離出海嶠遙見層城隱半輪漸看阿閣銜初  
照潏灩黃金波團圓白玉盤青天流景披紅蘂白露含  
輝汎紫蘭紫蘭紅蘂西風起九衢夾道秋如水錦幌高  
褰香霧開瑣闌斜映輕霞靡霧沈霞落天宇開萬戶千  
門月明裏月明皎皎陌東西栢寢岩堯望不迷侯家臺  
榭光先滿戚里笙歌影乍低濯濯芙蓉生玉沼娟娟楊

柳覆金堤鳳凰樓上吹簫女蟋蟀堂中織錦妻別有深  
宮閉深院年年歲歲愁相見金屋螢流長信階綺櫳燕  
入昭陽殿趙女通宵侍御牀班姬此夕悲團扇秋來明  
月照金徽榆黃沙白路逶迤征夫塞上憐行影少婦窗  
前想畫眉上林鴻鴈書中恨北地關山笛裏悲書中笛  
裏空相憶幾見盈虧淚沾臆紅閨貌減落春華玉門腸  
斷逢秋色春華秋色遞如流東家怨女上粧樓流蘓帳  
捲初安鏡翡翠簾開自上鉤河邊織女期七夕天上嫦

娥奈九秋七夕風濤還可渡九秋霜露迴生愁九秋七  
夕須臾易盛年一去真堪惜可憐揚彩入羅幃可憐流  
素凝瑤席未作當鑪賣酒人難邀隔座援琴客客心對  
此嘆蹉跎烏鵲南飛可奈何江頭商婦移船待湖上佳  
人挾瑟歌此時憑闌垂玉筍此時滅燭歛青蛾玉筍青  
蛾苦緘怨緘怨含情不能吐麗色春妍桃李蹊遲輝晚  
媚菖蒲浦與君相思在二八與君相期在三五空持夜  
被貼鴛鴦空持暖玉擎鸚鵡青衫泣掩琵琶絃銀屏忍

對笙篴語笙篴再彈月已微穿廊入閨靄斜輝歸心日  
遠大刀折極目天涯破鏡飛

邯鄲行

邯鄲道上車馬多行人夜火渡漳河邯鄲女兒年十五  
能彈琵琶善歌舞青燈朱戶夜當鑪鑪頭酒熟喚客沽  
玉壺青絲為君繫不妨醉向邯鄲途君不見邯鄲市昔  
日繁華安可擬鳴鸞佩玉青雲間鬪鷄走馬紅塵裏平  
原門前客如雲千載淒涼竟何是黃金白壁成飛灰歌



樓舞榭空流水傷心萬事俱可嗟  
草長叢臺白日斜  
廢苑當時在何處  
舊宮今日作誰家  
古來富貴俱寂寞  
有酒樽前胡不樂

### 太白山歌

我聞太白橫西域  
百里蒼蒼見寒色  
靈源萬古誰窮探  
雷雨窈冥巖洞黑  
中峰迢迢直上天  
瑤宮玉殿開雲煙  
千盤萬折不到頂  
石壁鐵鎖空高懸  
陰崖皚皚積古雪  
絕壑長松幾摧折  
鳥道斜穿劍閣雲  
龍潭倒映峨眉月

高僧出世人不知飛仙凌空笙鶴隨洞天福地在咫尺  
悵望塵海令心悲

辰溪縣

早發辰溪渡清川喜泛舟山城歆粉堞江驛映朱樓雨  
驟沙頽岸天寒水露洲蠻音聞漸異迢遞動鄉愁

沅水驛

小驛孤城外陰森草樹幽晚涼憑水榭秋雨坐江樓絕  
域鴻難到空山客獨愁夜深歸渡少漁火照汀舟

沅州道中

歲月驚長道風塵惜舊綽雲盤曲磴沿月遡迴溪南  
國疲征歛西戎厭鼓鼙山深正愁絕落日鷓鴣啼

平溪

徙倚平溪館天高秋氣清水螢光不定山籟響難平夜  
火雲間戍寒楓江上城終宵無夢寐高枕聽灘聲

查城十五夜對月

中秋看月色移席近前楹河漢三更沒關山萬里明風

煙依獨戍砧杵閑空城此夜高堂上多應念遠征

其二

天上何所有團團白玉盤可憐秋半月只是客中看影  
直朱樓午輪高青嶂寒美人何處共光彩隔雲端

江門

小店江門市孤舟聞暮砧遠沙含細雨缺岸隱疎林旅  
宿青楓晚人煙翠嶽深漸臨巴蜀道一慰望鄉心

渡淮

津口風翻旆春陰鬱未開淮流衝古岸沙店倚長臺鳥  
向平蕪下人隨返照回未忘舟楫興臨路獨遲徊

中元夜月

片月東城上長風度早秋光臨青嶂發影抱碧潭流灝  
氣沈沙浦餘輝戀水樓何人更吹笛關塞不勝愁

晚歸自溪上

秋到城西樹緣溪落葉多數家連水竹一逕入煙蘿廢  
井寒螢聚閒窗暮雀過濯纓聞孺子燈下亦悲歌

雨中和清溪

濛雨蕭條至悲風日暮多積陰生徑草永夜落庭柯宅  
愧高人隱門勞長者過白鷗如有意相逐下煙波

吾州

遼邈吾州地名從申伯來通淮一水下入楚萬峰開舊  
國無遺廟寒城有廢臺秋郊獨臨眺懷古意悲哀

九日同馬君卿任宏器登高

歲歲重陽菊開時不在家那知今日酒還對故園花野

靜雲依樹天寒鴈聚沙登臨無限意何處望京華

登釣臺

野濶窮秋出雲寒望未開萬峰遙駐馬殘日更登臺水  
落龍蛇蟄沙空鴈鷺來孤懷對搖落吟罷有餘哀

再別清溪子

冬館蕭條別開樽為爾吟岸梅催客鬢江柳送歸心南  
國浮雲暮孤城積霰陰逢春湖鴈起休滯北來音

懷沈子

沈生南國去別我獨悽然落月清江樹歸人何處船十  
年安陸舍數口太湖田想到鄉園日生涯亦可憐

懷孫世其

世路渺難定相期未有涯昔為燕地客常到楚人家繫  
馬中堂樹聽鶯上苑花故園看北斗腸斷憶京華

酬葛時秀

罷歸翻自喜舊業有青山積雨稀來客孤雲獨往還良  
朋枉高倡撫卷一開顏何日還乘興題詩到竹間



遊賢隱寺次馬君卿韻

繫馬長松下風煙幾日留  
天高還薄暮地迥更逢秋  
孤嶂開僧舍千峰繞佛樓  
自能來白社不用遠公求

登堅山寺

西峯挿天起絕頂寺門開  
雲裏一佛住山中無客來  
落花平講席積草徧香臺  
我欲聞清梵焚香坐不回

九日懷鐵溪

獨憶高夔府何時騎馬來  
一秋常卧病九日廢登臺  
寂

寔傳杯手淒涼作賦才陶家園內菊風雨為誰開

送柴先生之霍丘訪朱調元

客裏黃金盡天邊逐歲華寒燈具行李早飯出山家東  
路靡蕪滿西風楊柳斜朱君舊相識見爾惜生涯

訪賈西谷

儒宮入古檣泮水靜塵埃偶到閒官舍能孤遠客杯開  
門黃葉落展席清風來更喜庭前菊寒花日暮開

雪

一雪今冬早霏霏白滿沙隨風斜着樹帶雨不成花曲  
檻寒仍裊空庭晚更加城中一萬戶歌舞是誰家

得五清先生消息尚客澧州悵然有懷

憔悴東都士吾師更可嗟三年為逐客萬里未還家暮  
阻巴山雪春行楚岸花江湖無路覓流涕望天涯

喜劉朝信過飲

西郭棲遲地春風亦可憐落花寒食雨高柳夕陽天岸  
幘行林側移樽坐水邊啼鶯如有意數傍舞衣前

劉朝信讀書山寺

嗜靜山中寺藏修此度年白雲千嶂裏清夜一燈懸書  
卷留孤客盤飧傍老禪何時騎馬至訪爾古松邊

西谷有淞聘予喜其得勝遊因話淞中之勝  
君向杭城去茲遊似馬遷應傳越客酒先泛楚人船入  
郭湖天迥觀潮海月圓因君話禹穴高興亦飄然

送徐生赴試

爾到梁都日西風發醉歌秋深花近苑夜迥月臨河姓

擬傳霄漢身應謝薜蘿佳音附來鴈報我莫蹉跎

送別劉朝信

萬里向天涯孤城對日斜雲山共此別世路獨長嗟暮  
雪燕關樹春風漢苑花知君騎馬地名姓滿京華

和賈西谷暮春雨後之作

溪雨清明過游雲薄遠空鷗喧春水至燕落晚泥融麥  
秀千家暗桃花昨夜風獨憐艷陽日尊酒未能同

三月七日同諸生出遊

卷四百五十八  
清晨招爾輩同出眺煙沙寒食孤村路春風萬樹花藉  
蘭臨水曲折柳到山家獨少青尊共能無愧物華

九日震雷山懷望之

九日東山上思君江漢深故園頻宴會佳節自登臨衆  
壑流雲氣孤峰落日陰應知楚山上獨賦望鄉吟

春來

春來稀灑掃門徑碧苔滋積雨忘昏曉幽居感歲時寒  
雲低旅雁城樹暗黃鸝獨立傷春色蕭條萬事悲

寒食

沙岸青春雨風吹野水涯不沾寒食酒空映古墳花城  
郭人煙細樓臺暮景斜東流爾何意滾滾送年華

同趙先生宿山家

同宿京華地今來又六年那知風雪夜復此共床眠水  
曲隣燈照山高石溜懸中宵不成寐話舊各悽然

出寺過胡山人家

細雨清沙路經行獨杖藜那知白社客更向碧山棲花

好園牆發鶯嬌入院啼風光不能醉吟望轉淒迷

飲邦重山莊夜歸

殘日喧歸騎漁樵仄徑逢煙中望北郭樹裏下西峰深  
夜明林火蒼茫度水鍾朝來向城市誰憶白雲蹤

賢隱寺次劉朝信

翠壁青蓮界蒼苔白石關春晴初出郭日暮更登山歲  
月頻經眼煙霞可駐顏化城依宿處自覺此身閒

王生館雨坐



獨坐王生館淒然歲暮心高城翻落照空院積寒霖雁  
鷺秋飛盡蛟龍夜或吟西山舊松竹雨雪共蕭森

登西巖寺

西林禪誦地石壁倚天開曲磴千盤上飛泉一道來園  
禽巢古殿野鹿過香臺共坐題詩暮山花落酒杯

近寺

梵宇頻經處林深入磬聲懸崖攀葛上曲澗遶松行花  
鳥還春日樓臺即化城亦知身是妄從此學無生

獨立

鼓絕孤城掩溪傍春事殘岸霞晴映樹汀雨暮生寒風  
外看花盡煙中望柳繁靜觀時物變獨立思千端

梅

野水無人地寒梅獨自開花疎間翠篠樹古積蒼苔嶺  
雪春潛至林風香暗來一枝猶可折橫笛暮休哀

曉起見雪

曙色空牕裏鳴禽更好音幽棲忘盥櫛偃卧問晴陰卷

慢山雲起開門野雪深不愁泥濘路騎馬度西岑

廢屋

廢屋空山裏風沙不見人壞牆惟有徑獨樹更無隣  
寇盜三關逼徵求萬國頻江湖暮搖落回首一沾巾

送呂子

京洛三年客雲霄萬里違上書皆不報解珮獨先歸  
北極臨燕甸南山繞漢畿相將未可料岐路斷蓬飛

餞子容

客館西垣靜開尊為汝歌檻花深晚坐城樹喜頻過綵  
鷗春湖色驪駒白玉珂還鄉君信樂予奈別愁何

送鄒子之浙中訪迎張子

此去尋張子東行指宋畿秋城悵獨往春棹好同歸雨  
外吳帆重江中越岫微平生壯遊興送汝並翻飛

送熊御史尚弼謝病還江西

晨車發帝里秋棹返江鄉草奏孤臣淚懷歸久客腸海  
鷗思避俗湖雁喜隨陽攬轡平生志還山未可忘

送韓仲子並訊其弟季子

令弟先君往伊予實嘆嗟竄身還故里避世入山家斜  
日秦城柳繁煙渭曲花豈知燕地客騎馬日風沙

送賈郡博之階州

十載一儒官西行路復難羗夷應俎豆邊徼有衣冠隴  
坂盤雲上秦城向斗看好音懷萬里早晚報長安

送楊子濬下第還廣東

憐君不得意春盡獨還家路入蘼蕪草亭深枳殼花客

舟江上遠鄉樹嶺南斜盛世多遭際寧容問釣車

送楊驛丞

聞說丹河地孤城海上開  
鹵煙出市井潮影動樓臺  
漢使傳宣過夷官入貢來  
皇華歌送客應閱出羣才

送顧華玉謫全州

白日春城暮孤雲天際陰  
君行萬里外予意一何深  
夏擬浮湘水秋應到桂林  
衡陽去不遠莫使鴈書沈

送曹遜卿還汝寧

三年觀國士此日暫還家去指清淮月行攀上蔡花燕  
歌送楚客邊雁起城笳却喜干戈後鄉園見歲華

送欽師歸西山

近向雲間至遙從花下還赤崖春到寺白塔晝開闕風  
雨如西塞煙霞似北山到來應待我祇樹幾回攀

送侯汝立之東昌

東郡瘡痍日蒼生屬此行二毛猶未見五馬亦為榮月  
對河關上秋從海嶽生向來蒿少約西望各懸情

贈劉東之憲副

浮生能幾見孰謂別離輕  
遠道惟長劍寒宵共短檠  
旌旗臨漢水雨雪度秦城  
鄉井衣冠少分攜益愴情

元夜寺中集

火樹連龍苑煙花繞鷺峰  
詞人高宴會令節喜過逢  
閣度銀河上窗含寶月重  
九衢風起夜處處有歌鐘

贈祖邦

白下通緘少燕都見面逢  
客心悲歲晚歸路及春時  
姓



入山公啟人傳水部詩同年吾不及相望赴前期

秋夕懷曹毅之

百卉飄零盡孤鴻何處歸高樓橫暮笛萬戶搥寒衣南  
國江湖遠佳人尺素稀獨愁誰與晤明月鑒重帟

寄任司訓

不見任公子飄飄旅客魂苦吟惟白髮生計有清尊散  
吏真兼隱荒城不異村人間好事者誰到廣文門

至日寄望之汶上

至日懷親友題書在帝鄉風雲餘歲色梅柳復年芳  
白髮行藏裏清尊涕淚傍思君魯城北汶水日湯湯

寄空同子卜居襄陽

爾定襄陽宅雲山好傍誰草憐王粲并花醉習家池  
留滯悲江漢驅馳感歲時扁舟空悵望未有鹿門期

寄徐太守

塞鴈去復盡燕臺愁望春十年同病客萬里各風塵  
南國已碧草清江空白蘋秋來有詞賦莫使怨騷人

寄家書

一返滇中使重嗟故里違老親遙在念薄祿未能歸雨  
雪三冬暗家書累月稀淚絨燈下發迴鴈隔雲飛

酬郭內翰上陵還詩

帝遣朝陵日暫辭供奉班楸梧開玉殿雲霧宿春山晚  
向千松散晴從萬壑還知君有佳句傳和五陵間

得王子衡贛榆書

萬里一書劉逾年傳帝都竄身天地遠垂淚海雲孤柳

送燕臺駿花留漢殿鳬赤霄終道路白髮且江湖

九日顯靈宮宴集

九日無風雨賓朋更遠來菊花催酩酊仙侶得追陪  
眺迥山河出登高殿閣開攜遊有諸妙詞賦豈吾才

遊郭氏山亭

舊日追遊地新年此度過庭春歸雪篠洞古發煙蘿  
遲日登臨倦名園感慨多風花騎馬去須放酒顏酡

九日登慈恩寺閣

不到慈恩久今來九日期天寒鴻雁少秋晚菊花遲  
搖落悲風雨登臨感歲時牛山何處是異代獨興思

宿洪公方丈


落日罷登臨禪房秋坐深不妨留枕簟聊得謝冠簪  
樓閣湖天影松蘿洞月陰明朝又城市回憶碧山岑

出閣過勤甫省中

梧垣通左掖花省接仙郎並坐停杯晚高談卷幔涼  
水陰沈紺殿山影落雕牆愧我同朝客傳君寡和章

再遊郭氏園亭

仲夏一到此主人開水亭園林再駐馬臺榭已流螢細  
竹搖風牖孤雲度石屏停杯更暮雨何限北崖青



石倉歷代詩選卷四百五十八

欽定四庫全書

集部

石倉歷代詩選卷四百

五十九  
六十

詳校官石中允<sub>臣</sub>薩敏

侍讀<sub>臣</sub>孫球覆勘

總校官進士<sub>臣</sub>朱鈐

校對官中書<sub>臣</sub>汪學金

謄錄監生<sub>臣</sub>錫福

欽定四庫全書

石倉歷代詩選卷四百五十九

明 曹學佺 編

明詩次集九十三

何景明

十四夜對月集陶良伯

陶令堂中月深更酒為携金波流未滿白露迥含淒鴻  
鴈秋江北芙蓉漢苑西一杯同悵望萬里各羈栖



夜集勤甫宅時秉衡至

同鄉耽宴築浮歲感飄零况復故人至相邀明月亭  
琴清繁玉露坐久密秋星從此冀佳貺無忘瑤草青

人日齋居過王德徵

齋居春晝冥獨過子雲亭雨雪逢人日江湖問客星  
望來花漸發愁劇柳還青更話東歸棹遙遙海思停

夜過劉以道兄弟

風燈懸岸館竹色靜春沙山水停湘瑟池塘到謝家  
雪

融花尚細煙裊柳初斜對酌情親夜能無戀物華

清明日同諸友遊城南寺

風畫人遊少沙郊馬並行穿花尋野寺冒雨出春城骨  
肉新傷淚賓朋遠至情天邊有芳草故向客愁生

懷麓堂集將遊東園以風雨遂止

仲夏陰晴半林塘水石隈窗雲開遠色簷日度輕雷雨  
阻東山屐天留北海杯門牆接苑樹長晝得遲迴

同川甫寺中避暑

偶到清涼地番思苦熱哀水堂菡萏折風殿薜蘿開逃  
暑無三伏凭虛有一臺西山晝雷雨不見洗天來

夜集錦夫同本貞限韻

萬里同鄉友飄零嘆此逢江山饒涕淚歲月老形容風  
散城邊角雲傳海上烽中原尚格鬪未可問雲松

一舫齋

乾坤聊一舫高卧此齋深竹散琴書色窗開島嶼陰乘  
桴浮海意擊楫渡江心無限風波裏何人嘆陸沈

鏡光閣

峻閣岧嵕上層城眺望中  
風鈴齊送響雲磴曲盤空  
海色搖窗碧蓬萊影日紅  
翠華無復到長鎖翠微宮

新鄭道中

客路臨新鄭雲沙望轉平  
夕煙生斷塹野水入荒城  
下馬看碑誌逢人問地名  
千秋陵谷在懷古益多情

銅雀臺

美人望陵處無復翠華過  
殿冷閒歌吹宮春罷綺羅  
落

花嬌靨盡芳草怨魂多日暮漳河水東流空白波

壽廊廷瑞太守

五馬歸來日閒身六十強春花自爛熳雲水共徜徉  
種萊公竹邦留召伯棠平生天下志白首付滄浪

海嶽陳翁輓章

白雲送秋老築墓海門邊花憶啼鶯日風悲種樹年  
人間餘翰墨天上有神仙從此遼東鶴千年更一旋

內直遇雪

裊裊城雲影蕭蕭急霰催遠從仙閣度輕繞鳳池廻弄  
日搖彤管含風引玉杯春還今歲早先報漢宮梅

秋雨

斷續城頭雨空齋錄蘚封孤燈聞過鴈四壁起鳴蛩細  
草傷心碧幽花滿目濃美人居綺陌幾日不相逢

三月三日

病眼看天地風沙當晝吹賞心沽酒伴行樂過花時水  
曲蘭芳靜城陰柳絮遲東郊有車馬春色報人知

觀荷

入院高荷密留尊  
菡萏遲絳房扶水  
萼翠蓋倚風枝檻  
坐明星夕窗過驟  
雨時流螢點點渡  
故傍綠陰池

沙慶宅紅菊

紅菊開時暮亭亭  
冠物華亦知顏色  
好不是艷陽花羅  
綺嬌秋日樓臺媚  
晚霞清香如不改  
常傍美人家

長安柳

三月長安柳春風  
吹暮天花飛御溝  
水葉傍漢宮煙繞

岸猶堪折臨流更可憐故園無限樹零落戰場邊

芍藥

城中芍藥徧席上把殘枝上苑相看日春風爾較遲艷  
歌翻錦瑟酣醉倒金卮南國今開罷園亭數夢思

春鴈

花初背楚澤雪罷度桑乾漸起隨春色高飛犯朔寒書  
停江國望陣倚塞門看憶爾常南北無嗟行路難

鴈



嘒嘒胡笳怨飄飄南鴈翔長風度關塞九月下瀟湘積  
水浮連影遙空起斷行故園秋望盡聞爾淚沾裳

贈張時濟陳伯行胡承之周少安三月三日出

城遊宴

芳筵開上日才子出京華暫別含香署俱停訪石槎秦  
川平對酒漢苑曲穿花應共題春草相過謝客家

登五大原謁武侯廟

風日高原暮松杉古廟陰三分扶漢業萬里出師心星

落營空在雲橫陣已沈千秋一瞻眺梁甫為誰吟

普緣寺有馬融讀書洞

春山尋古寺昏黑尚攀緣仄徑千盤轉巉崖萬仞懸虎  
常啼白晝猿故墮青天欲訪名賢洞泠泠隔澗泉

青峰閣曉霽

初日東峰上微微霽色分丹崖含宿雨青嶂拂歸雲候  
騎林端發鳴笳樹裏聞前山更可愛晴望碧氛氲

馬道驟雷雨復霽

萬壑驚雷起千峰鳴雨過稍看風瀨減更覺夏雲多虹  
飲垂青澗猿行掛碧蘿山中無吏事長嘯答樵歌

咸陽原

千秋陵墓地駐馬惜茲行晚日登原殿晴天見渭城望  
春時極目訪古獨含情奈有咸陽草風吹歲歲生

長春宮

夜宿仙人館晨聞鳳吹停玉牕開曉月丹井汲春星久  
秘長生訣空留不死庭下山回一望巖壑杳青冥

武關

北轉趨劉垌西盤出武關微茫一線路迴合萬重山天  
地幾龍戰風雲惟鳥還關門鎖溪水日夜送潺湲

昭烈廟

漂泊依劉計間關入蜀身中原無社稷亂世有君臣峽  
路元通楚岷江不向秦空山一祠宇寂寞翠華春

鹿苑寺

舊宅施為寺青山屬野僧高人不可見勝迹尚凭陵色

藉荒庭草陰垂古殿藤千崖一微逕異代幾攀登

兩河口

東下商南路西辭蜀北門青山兩河口古戍百家村曲  
棧盤林杪危湍噴石根經過回白首蹤跡半乾坤

悼馬詩

予家買得一馬齒小而良丁卯歲季夏十五夜予忽夢一龍子立階下踞蹠而死夢警僮在戶外呼曰廐馬死廐馬死予怪且惜之作悼馬詩十韻

乘爾方踰歲何期病忽危四蹄猶未鑿雙淚泣長垂渥  
水千年降房星一夜隳早逢田子嘆終共塞翁悲顧影

辭金絡遺骸戀敝帷  
詎能酬飼秣那復效驅馳  
首蔕殘空榷莓苔  
滿故池風塵思駿力  
煙海失龍姿惆悵玄黃  
句淒涼赭白詞平生精志在不愧主人知

簡粹夫

二十知學道于今猶未真  
白髮空愁我金丹不遇人  
側身向天地舉足墮風塵  
乘雲空有興涉海浩無津  
聞君能鍊骨妙論頗通神  
倘惠長生術高揖謝親賓

子衡在獄感懷二十韻

朋儔日乖蹇念汝涕如瀆賈誼生非晚鄒陽志不羣書  
從梁獄上哭向漢庭聞天地虞羅密江湖釣餌芬路豺  
那可問屋鼠竟難熏已懼蒼蠅點真成貝錦文神龍在  
污淖鷺鳥失青雲日月益還復薰蕕器不分斗間誰辨  
劍野外枉懷芹說虎嗟何及亡猿禍已云高才元脫畧  
衆口但紛紜木直防先伐蘭芳忌自焚畫臺幽白日冬  
井下霜氛曉搗明星替陰牆白草曛連驂虛繾綣尺牘  
阻慙慙石父遭齊相鍾儀滯楚軍受書賢不死演易聖

猶勤縲紲終非罪文章固有勲燕臣霜霰烈庶女震雷殷  
佇見天王聖金鷄早赦君

渡涇渭

北回亂涇渭東眺極澄瀛落日兩盪滴遙天雙帶縈波  
流互明滅岸圯屢崩驚隔樹望廻合分濤揚濁清堰渠  
饒上壤形勢迫西京漕挽通秦甸津梁跨漢城湮沈九  
州會雄壯八川名空挹入河志復含浮海清風沙滿世  
路雲浪渺江程鵲去星源遠鯨翻霧島輕片帆倘可借



萬里自茲行

武昌聞邊報

傳聞虜騎近長安  
北伐朝廷已遣官  
路繞居庸烽火暗  
城高山海戍樓寒  
一時邊將當關少  
六月王師出塞難  
先帝恩深能養士  
請纓誰為擊樓蘭

長安驛

暮雨蕭蕭雲黯黯  
數家山下起炊煙  
窗聞早鴈秋多思  
門對寒流夜不眠  
遠使正持三楚節  
舊遊曾扣九江船

驛程南去無窮路  
來往風塵閱歲年

岳陽

楚水滇池萬里遊  
使車重喜過巴秋  
千家樹色浮山郭  
七月濤聲入郡樓  
寺裏池亭多舊主  
城中冠蓋半同遊  
明朝又下章華路  
江月湖煙綰別愁

岳陽城中聞笛

何處笛聲三四弄  
坐聽疑隔楚江濱  
落梅折柳怨清夜  
激羽流商哀白雲  
月上山樓人獨倚  
風高秋院客先聞

洞庭空濶瀟湘冷縹緲餘音送鴈羣

七夕

夜久高城風露收微雲斜漢兩悠悠閨中擣素思闌塞  
樓上穿針待女牛屏燭夜深秋似水池花香淡月如鉤  
桂宮高處寒多少誰念嫦娥此夜愁

華容弔楚宮

別館離宮紛綺羅細腰爭待楚王過章華日晚春遊盡  
雲夢天寒夜獵多廢殿有基人不到荒臺無主鳥空歌

西江煙月長如舊只有繁華逐逝波

秦人洞

聞說秦人此避秦  
碧桃零落舊時春  
家移洞裏難知姓  
水到人間易問津  
山色溪聲自今古  
石床礪戶空埃塵  
洞前即是南征路  
來往年華客鬢新

月潭寺

玲瓏金剝白雲邊  
踏閭攀林一徑穿  
龍出洞門常作雨  
鶴巢松樹不知年  
僧來殿上鳴鐘飯  
客到山中借榻眠

怪底夜來難得寐秋風窗下遶流泉

出新添城

出城凝望一沾巾行到窮邊見洞民  
青草時多逢瘴死白茅房為住山  
貧秋來萬里倦為客日落千峰愁殺人  
聞道徵兵需北戰朔風應已卷飛塵

憶中舍諸寅

憶昨共陪天北極幾回朝賀識龍顏  
簾開仙掖宮雲近地隔金河苑日閒  
青瑣夜歸池上珮朱衣曉入殿中班

只今遠使違趨奉清夢常依霄漢間

安莊道中

處處人家空薜蘿幾年凋弊擾干戈山過白水峰巒峻  
路入盤江瘴厲多嶺徼土風連百粵郊原人語雜諸羅  
側身西望省銅柱此地曾經馬伏波

漢將祠

嵯峨高嶺入雲平嶺上人傳漢將名殊域歲時供祭祀  
千秋祠廟著神明古牆不辨丹青色深夜猶聞劍戟聲

下馬獨來詢舊事殘碑無字紀南征

白帝城

峽口風悲猿夜號孤舟燈火宿煙臯草深廢井人家少  
水落寒山雉堞高自古金湯難恃險當時版築豈知勞  
永安亦在荒城裏玉殿淒涼空野蒿

歸州

暮雲天際見高城行盡千峰峽漸平古郡山頭萬家住  
客舟江上一燈明竹枝慣聽巴人曲鳥道纔通楚國程

未卜東歸何日到片帆斜月對離情

郢中

荆門南下接平疇蕭索風煙似晚秋  
衰草茫茫楚宮廢荒城寂寂漢江流  
人亡異代空遺宅歲暮他鄉獨倚樓  
最是陽春音調古至今歌罷少人酬

還家口號

十年奔走違親舍此日歸來喜不禁  
敢向明時輕組綬祗緣多病乞山林  
閒居擬著潘安賦高卧寧知謝傅心



早晚南巖桂花發開軒相望一長吟

病後

病後頻驚節序過不將風景怨蹉跎秋來門巷依楓橘  
歲晚衣裳戀芰荷洛下閒居辭宦早茂陵消渴著書多  
鳳凰池上三年客驪褭空鳴白玉珂

吹笛

橫笛高城弄晚颼碧空如水鴈來時關山月落腸應斷  
樓閣秋生響易悲楊柳天邊渾折盡梅花江畔故開遲

武陵回首南征路一曲那堪馬上吹

人日懷孟望之

人日登高聊引興萬峰寂寞對申臺鶯花出郭還難見  
雨雪逢春尚未開沙畔柳條悲暮角城邊栢葉照寒杯  
關河悵望東歸使渺渺孤槎幾日迴

九月二十六日同賈廣文劉舉人任貢士高夔  
府先生宅內賞菊

陶令門前花盡開郭西騎馬看花來疎枝淡蕊寒仍發

細雨斜風晚更催  
擬向夜深還秉燭  
可憐秋盡始傳杯  
相逢一笑真非易  
共把繁枝醉不回

生子

兩歲歸來生兩雛  
故園夫婦亦相娛  
盧家自愛添丁好  
徐氏誰言二子殊  
未論圖書能繼業  
且教門戶有懸弧  
劬勞正念吾親在  
更遣悲歡此日俱

無題

豔舞嬌歌出絳紗  
黃金不惜教琵琶  
鴛鴦本是雙棲鳥

茁茁元開並蒂花紫玉豈忘韓重侶綠珠寧負李倫家  
多情自古還多恨鴈斷春風荅柳斜

次韻酌莊國賓見訊

多病無能合罷官清時那敢獨求閒  
遠沙月出明如水高樹雲來暗似山  
已恨緇塵侵素服不教青鏡老紅顏  
美人歲暮勞相問叢桂山中祇自攀

答雷長史

每誦清詞動我愁山中歲暮苦無酬  
因攀桂樹遙相憶

欲寄梅花可自由萬里江湖雙涕淚百年天地幾交遊  
誰憐舊日中朝客謫向王門半白頭

雨中留蔡黃二親

門巷泥深過客難百年聊共此盤餐浮雲落日山河暮  
細雨青春樓閣寒近夜蛟龍還入浦久陰鴻鴈更移灘  
年華滾滾相逢少莫厭拌留到夜闌

葉四公子西園

邀客西園公子家東風二月已飛花  
卷遮碧柳行春馬

樓倚青山落暮鴉移席尊壘迭出浦入舟燈火更依沙  
清吟况接同鄉彥應有文星動水涯

送趙司訓喪偶還羅山

燕姬砧杵催楊柳楚客衣裳緝芰荷宦況不為謀拙賦  
閨情空續悼亡歌愁聞鄭監青氈苦老覺安仁白髮多  
日暮千山歸故國秋深一鴈度黃河

苦熱

燕京閨夏清涼阻楚客羸軀毒熱偏雨過即如旱濕地

雲來翻助鬱蒸天  
南邦僻地寒江閣  
西嶽高峰玉井泉  
思有丹梯凌倒景  
恨無孤棹截長煙

西海子

寺下煙波春不開  
苑中風浪隱樓臺  
源泉細繞西山出  
雲氣深從北極來  
萬里乘槎觀日月  
十年登閣望蓬萊  
黃塵碧水須臾事  
莫使魚龍夜夜哀

七夕

楚客旅魂驚巧夕  
燕京風俗闌穿針  
樓臺送暑催秋扇

關塞迎寒起暮砧海內弟兄風雨夢天涯兒女歲時心  
乘槎莫問支機石河漢年年此夜陰

雨夕集世其館

秋風淅淅吹人衣鳴雨瀟瀟晚細微萬里賓朋留不數  
十年江海願常違高城木葉聞先下客舍流螢見已稀  
為報春來鴻鴈侶塞門霜雪好南歸

和張子純白髮

我見秋風驚壯心君悲白髮苦相侵愁多不道潘年少



吟苦誰知越思深客裏歲時供覽鏡天邊霜雪助沾襟  
平生浪說如雲盛蓬鬢稀疏底似今

送張國賓進萬壽表還

名王表達維藩禮賓使恩勤奉教時鳳管暫停秦女曲  
龍旂遙覩漢官儀秋楓旅夢迴青瑣春草鄉情動玉池  
歸到定知承睿問雪園梅殿有佳期

送王秉衡謫贛榆

嗟君萬里復南遷此別江湖倍黯然日落塵沙行海上

春生霜雪到天邊中流得瓠常相保  
九折回車且自全  
世路風蓬各飄轉不知攜手是何年

晚過君采次韻

朔雲卧對寒城菊燕月留沽晚市醪  
向客靡蕪南國遠  
背人鴻鴈北風高杜陵愁極惟雙淚  
潘岳情多已二毛  
同病相憐不同去莫將江海問西曹

得獻吉江西書

近得潯陽江上書遙思李白更愁予  
天邊魑魅窺人過

日遠承明獻子虛鼓柁襄江應未得買田陽羨定何如  
他年淮水能相訪桐栢山中共結廬

兩湖書屋

書屋何年結構成青天對落兩湖清岸迴沙檻龜鼃圻  
水抱晴窗日月生開卷已知當世事下帷應見古人情  
扁舟南國無由並暮采芙蓉悵獨行

送韓大之赴新都

漢庭仙令幾時回蜀道風煙此日開萬里一琴將鶴去

九霄雙鳥望鳬來雲邊石棧斜懸閣樹裏春流曲抱臺  
藏器久知盤錯志脫囊今見古人才

蘇考功宅宴集

九衢春月罷歌鐘萬井晴煙翠欲重吏部文章今再見  
漢京冠蓋日相逢流鶯漸歷宮中柳鳴鶴先傳寺裏松  
細酌清吟聊此席北山南郭是吾蹤

和李宗易內翰立春日作

春日長安車馬迎密煙輕旭弄朝晴詩來草動池塘色

吟罷花增館閣情  
萬里江湖桃竹杖  
十年風雨木燈檠  
一官樗散空時序  
又見春盤細菜生

寄世恩愛日樓

東曹昔賦望雲行  
南國今傳愛日名  
九折豈忘回馭志  
百年真慰倚門情  
江鄉春水鱖魚至  
海岸冬雷竹笋生  
珍重樓中調膳者  
此身何止萬金輕

天壇雷道士院

帝宮高鎖漢郊畿  
羽士琴書靜可依  
蘿洞晝棲雲霧入

石壇秋禮珮環歸叢叢晚竹臨風整  
嚙嚙玄蟬曳日微  
渡海却思千載事買山今恨十年違

送王御史德輝西巡

中朝御史重西巡獨下青霄斧鉞新  
隴雪洮雲行塞日  
胡琴羌管奏邊春蒲桃不博涼州地  
天馬還隨漢使臣  
白筆萬人看氣象肯令河外有煙塵

送衛進士推武昌

少年佐郡楚城居十郡風流盡不如此去  
且隨彭蠡鴈

何須不食武昌魚  
仙人樓閣春雲裏  
賈客帆檣晚照餘  
大別山前江漢水  
畫簾終日對清虛

送陸舍人使吳下

柳拂清江畫蠲飛  
節旄更喜便南歸  
迴風樹裏催官騎  
返照河邊上客衣  
北固樓臺秋寺徧  
長洲花草故宮非  
登臨莫怪多詞賦  
吳下才人是陸機

寄康子

十年朋輩飄零盡  
海內兵戈戰鬪餘  
花劇秦川誰見汝

鴈稀燕塞渺愁予碧山擬著潛夫論丹壁應藏太史書  
自笑此身今更出風塵空望白雲居

石磯

石磯無伴滿蒼苔秋杜春蘭晚自開江日煙波雙鳥去  
楚天風雨一舟來釣鰲獨有滄溟興夢鶴誰知赤壁才  
芳草歸人不愁思水雲山郭見章臺

過寺訪以行

今年春色倍堪思奈爾看春病起遲  
牕矚太行雲斷處



坐聞江漢鴈來時  
柳香漸撲燕姬酒  
草色頻催謝客詩  
更欲息栖尋野寺  
細蘿芳杜碧山期

輞川

飛泉萬壑通藍水  
仄徑千峰入輞川  
野老豈知旌節到  
世人空作畫圖傳  
黿鼉岸圻深無地  
鷄犬林開忽有天  
即此買山堪避俗  
桃源何必訪神仙

華州作簡桑汝公

秋城雨色靜微塵  
過陝山河望轉新  
天上岳蓮開二華

雲中關樹引三秦追遊少小還今日浪迹乾坤任此身  
乘興欲攀仙掌去未知登覽共何人

平夷所老人

平夷老人髮兩肩哀哀淚落古城煙歲收斗粟輸田賦  
日向諸隣乞米錢風雨饑寒趨路側子孫流落避兵年  
青春有伴難還土白首無家尚戍邊官裏征徭何日已  
軍中苦樂古來偏魂驚戰鼓心猶怯臂中飛弧肉尚穿  
獨去負戈巡夜砦誰來銷甲種春田朝廷德意思柔遠

閭閻謨猷在識先  
夷狄本為王者外  
卒徒能受帥師憐  
敢愁溝壑填衰謝  
只擬封疆息穢羶  
我願麾下法唐將  
籌邊有策到今傳

兵書峽

空巖一卷書  
綠苔字應滅  
志決功不成  
千秋有餘烈  
絡緯吟

絡緯催寒女  
悲吟入總幃  
秋風啼不斷  
相伴下鳴機  
雨後

水漲孤村白天垂四野青開門秋雨霽閒步郭西亭

獨坐

獨坐鳴蟲起秋懷已不勝西風窗下度木葉洒寒燈

寄孫世其

旅食京華暮那能不憶家封書何日至塞鴈一行斜

出寺

春遊翠微裏晚下白蓮臺立馬遙回首青山暮雨來

寄李獻吉

君作梁園客予登楚水臺春風河上柳不寄一枝來

清明

城南好花樹不作看花行恰好人來日春風不放晴

夷陵

夷陵城邊江水渾無數輕帆落遠津萬水雲中三峽路  
猿聲愁殺渡江人

溪上水新至漫興

溪上水生三尺深茅堂清夏氣蕭森無錢即買扁舟至

繫向門前柳樹陰

秋日雜興

寒螿啼斷槿園空萬樹凋傷  
八月中只有南山蒼桂在一  
株花發向秋風

其二

雨花風葉總堪憐  
海燕江鴻各渺然  
莫向高樓空悵望  
暮蟬多在夕陽邊

其三

紫蔓青藤各一叢野人籬落管西風郊扉遠絕誰能到  
秋日蟲鳴豆葉中

其四

栢林楓岸迥宜看楊柳芙蓉不禁寒最愛高樓好明月  
莫教長笛倚欄杆

葡萄

情關裊裊風鬚動暑架垂垂露乳寒却憶高樓清夏日  
美人常對水晶盤

友人夜宿

相逢猶憶十年前  
青草書堂溪水邊  
四海交遊今殆半  
幾人風雨對牀眠

任洪罷草亭

蔀簷當午溪雲度  
花重寒枝閣曉庭  
芳草閉門春寂寂  
東風吹雨半池青

其二

繞屋南山秋色靜  
數枝寒菊一籬煙  
酒醒讀罷秋聲賦



風落松梢響石泉

晚至昌平寺中

度盡青溪十里霜寒蕪落日下蒼茫山城薄酒無錢買

晚飯僧家石耳香

畫竹

誰開素練寫煙梢欲采琅玕奏玉簫猶憶鳳凰池閣上  
坐聽風雨下層霄

石倉歷代詩選卷四百五十九